

佛說處處經

後漢沙門安世高譯



清刻龍藏佛說法變相圖

佛說處處經

敬四

後漢沙門安世高譯

佛言道人行道若瞋恚意起時即當制已制
便念善是為道人行若布施財則得之便計
無常不隨身犯謂不犯殺盜姪是為不隨身
犯出瞋恚者口亦不言意亦不念是為出瞋
恚意中大深聲者譬如人作盜說言汝所作
大無狀是為意中大深聲佛言味味次第者
所食物外合之內分別其味令不錯誤是為
味味次第菩薩所以得知者前世所食噉皆
先上父母道人然後自食是故得是三十二
相八十種好佛言菩薩用四事得四無所畏
一者自身所知亦欲使人悉知二者教人無
厭極三者等心無所藏匿四者為人說經從
後不悔是為四事佛亦用四事得四無畏一

者如法說二者不受他人物三者等心四者戒具佛言復有四無所畏一者如事說二者無所愛惜三者神足四者不與人共諍佛得頂中光明者有三因緣一者然燈施佛寺二者受樂明經三者解人疑結佛舉右手有四因緣一者用惡人無返復故二者以善人有返復故三者現教四者語人無作惡佛舉右手復四因緣一者欲令十方人皆來學道隨行意二者爲欲示人我所行福令得是相三者勸人皆令持戒四者威儀自爾亦爲不欲見人惡態是故舉右手佛不著履有三因緣一者使行者少欲二者現足下輪三者令人見之歡喜佛行足去地四寸有三因緣一者見地有蟲蟻故二者地有生草故三者現神足故亦欲令人意正佛行地高下皆平有三

因緣一者本行四等心欲令一切安隱地住水上水中有神蟲蟻一切值佛足下皆安隱同心志意是故卑者爲高高者爲卑二者諸天鬼神行福爲佛除地故高下爲平三者佛爲菩薩時通利道徑橋梁度人故從是得福故高下正平欲令人意亦爾佛不飛行有四因緣一者勸弟子欲令精進二者欲令弟子聽經三者報宿命恩四者現相是故不飛行佛在世時諸天鬼神龍人民皆到佛所聽經數千百重行坐前後皆見佛面所以者何佛前世時言語無前後是故無不見佛面者人卧皆隨佛所首用佛尊故佛初得道不食七日有四因緣一者念道忘食二者一心不飢三者歡喜不渴四者不念痛癢思想生死識是爲四欲使人聽經亦爾佛袈裟裏塵水不

著外垢不著有二因緣一者不念一切人惡故二者見一切人有欲欲令滅之佛復浣袈裟者外垢不著裏著有身故有垢所以者何外行已盡是故垢不著外內行未盡是故垢著用有身故爲內未盡以有身爲罪用是故不惜身命所以者何復惜命用命得道故佛說八十億萬因緣經都治人三病一者貪婬二者瞋恚三者愚癡是三事分爲六故應六衰治三病經所以多者譬如人服藥病不愈當更服餘藥佛言人意多端疾轉故多經隨敬四意療之欲使疾解故佛已得道復有三病六憂六憂者謂憂六入三病者謂心意識慮受故佛已得道有是憂病何況餘人殃罪不畢不得度世佛業未竟不得度世佛棄餘壽二十年有三因緣一者同世間人貪身故二者

所教已盡三者恐惡人誹謗之得罪重故便取般泥洹佛度世去亦不持身去亦不持意去但爲苦滅耳地水火風空常在世間無有斷時佛度世燒身有三因緣一者腐爛故二者蟲蟻生故三者人以香華持茲來得福故佛笑口有五色光出者有五因緣一者欲令人有所問因所問有益故二者恐人言佛不知笑故三者現口中光四者笑諸不至誠五者笑阿羅漢守空不得菩薩道光還從頂上入者當示後人大明故佛欲度世去諸比丘白佛言諸在世間人皆當從佛得福今佛度世去諸世間人民當復從誰得福佛言比丘我雖度世去經法當在復有四因緣可從得福一者畜生無所食飼之令得命二者見人得疾病無瞻視者當給與供養令得安隱三

者貧窮孤獨當護視四者人獨一身行禪念
道無所衣食當給視之是爲四事布施持善
意與之其得福與佛等無有異爾時身皆痛
便欲度世去佛謂舍利弗令說經者有三因
緣一者恐佛去後人不信餘比丘語故二者
勸弟子意令解佛尚令比丘說經何況餘人
三者現舍利弗功德恐餘比丘各自貢高欲
得說經故是故佛使舍利弗說經佛度世去
後諸阿羅漢共責數阿難佛在世時欲得水
何以故不與十方一切皆當從佛解脫汝何
以不留佛莫令般泥洹佛欲行四神足止住
一劫亦可百劫亦可千劫汝何不勸佛行四
神足阿難言如卿語佛爲不得自在耶當須
我言設使住止一劫在世間彌勒當那得來
下作佛佛本行共學道者有八十億萬人皆

求菩薩道惟有兩人得道耳一者釋迦文二
者彌勒其餘人有得阿羅漢辟支佛者佛忍
辱過於地心輒過於水意堅過於須彌山功
德過於海水智慧過於虛空以是故前得佛
耳佛言彌勒不來下有四因緣一者有時福
應彼間二者是間人麤無能受經者三者功
德未滿四者世間有能說經者故彌勒不下
當來下餘有五億七千六十萬歲彌勒時人
眼皆見四千里彌勒時人眼見四千里者本
行十因緣得一者不掩人眼明二者不捨人
眼三者不覆蔽人眼四者不藏人善五者不
視殺六者不視盜七者不視姪八者不視陰
私及人短九者諸惡事不視十者然燈於佛
寺是爲十事佛辟支佛阿羅漢是三人法同
行異佛者爲覺意辟支佛爲見因緣知阿羅

漢坐禪乃知辟支佛爲因緣見生死相自守不敢離行從見因緣得道故爲辟支佛佛者爲通行欲度脫人故故求辟支佛辟支佛自割身活五百人以木自刺其頸見因緣計校如割土見血是水見萬物皆非常便取道有辟支佛先世爲菩薩五百劫身以有三十相無二相不及佛不及佛者無善權方便故佛說生死勤苦三惡道事有點人意解便取阿羅漢雖作阿羅漢於中最尊所以者何用前世行菩薩道五百劫慈心欲度十方人故雖得阿羅漢智慧能曉方俗語初爲阿羅漢時不能自覺前世爲菩薩佛便說佛功德復說阿羅漢功德爾乃知佛功德大便自悔欲轉意取佛佛言已得阿羅漢道不可復得轉便自悔言我何愚癡止取阿羅漢道佛便爲解

意汝智勝餘阿羅漢智慧不及佛阿羅漢自斷苦不斷他人苦佛本行自斷苦亦斷他人苦是故不相及佛言舍利弗有三語悉以知人意一者麤語二者深語三者牽語得是三語有善意即見有惡意亦見有忍意亦見欲意從是三語悉知人意舍利弗白佛言彈指之間人意有六十生死佛言有九百六十生死復不多要有三意有善意有惡意有欲意有善意有三百二十惡意有三百二十欲意有三百二十彈指之間三意并行合爲九百六十生死除善意三百二十餘有六百四十生死意佛與舍利弗同行三十七品經智慧不等者譬如喘息同從諸毛孔出入能覺便但知鼻息氣出入佛所知悉知諸毛孔舍利弗所知如鼻孔取舍利弗智分爲十六分滿一

佛界三千大千日月天下點人所知不及舍利弗所知一分取佛智分爲十六分滿一佛界中舍利弗所知不及佛智一分三十七品行有三輩有大三十七品有中三十七品有小三十七品意大得大意意中得中意意小得小意深妙具行三十七品便洞達何以故正分分爲十六分人中本十六意故佛分別是故不同舍利弗知一切法語用時語護語守語佛便謂舍利弗去非時語用不可寄人故舍利弗本字優婆塞舍利弗先佛度世去有三因緣一爲宿命盡二爲不欲見佛度世去三爲無所復度脫舍利弗行受人飯已還精舍中言當償債謂當坐禪念道爲償債不念道爲負債行受人施譬如負債未畢復更取前罪未竟今復造罪佛言食人施不可不

念道亦自得復益一切用是故當償債佛言舍利弗點第一目捷連神足第一阿難多聞第一羅雲戒第一阿那律徹視第一佛使目捷連請舍利弗舍利弗言舉我帶恐不能勝目捷連便牽帶三千大千日月天地悉動不能令起舍利弗便生意當先去到佛所目捷連從後行先舍利弗至佛知二人各第一十方天下比丘無有如羅雲持戒者羅雲持戒有四因緣一者自念言我爲佛子二者謂命持多三者常自念我爲沙門四者持戒常欲勝餘比丘舍利弗復持一盂水著海水中托撈之明旦往取故水去舍利弗尚能如此何況佛目捷連爲人所擣不飛去不能得神足故何以不能得神足用罪未畢故佛言弗迦沙王行至十二門復還不知其身中六分秉

意能爲道不知身生意意生身不能分別是佛知可度故便往從宿王不知是佛佛問王行何法好何道而衣毛爲豎佛爲解身中事空於是便得道不悉斷不得阿羅漢佛言諸行者當知意能得道佛言昔者朱利滿臺學經二十四年得五言解垢下棄離亦不復憂何以故本宿命便見五百佛悉通知衆經但閉藏經道不肯教人後被病二十四日臨死時乃悔呼人教之有是一福故知五言何況乃具足教人得福不可計佛言昔有旃那比丘得病佛使舍利弗往與分衛舍利弗因問之汝眼寧有所識不旃那對言曰眼無有識但見色識生身生病對至故有病身亦不知死設身死者地水火風空皆當滅但爲意識移生耳佛遣舍利弗行分衛過婬女家便閉

門作治道謂舍利弗言汝不與我共婬者當入是大火中舍利弗報言寧入是火中不與汝共婬使人墮惡道無有出時天便來下救之佛言人但不能守戒若能守者終不憂爲邪道所中佛言昔有一比丘坐禪行道佛弟難陀飲酒醉數往來到其邊歌戲比丘白佛言我欲避之去佛言不須是難陀於今當得道迹佛即遣阿難往到其家摩訶迦葉隨其後舍利弗爲說經目捷連現神足難陀便歡喜即得道迹佛說比丘行道但當堅心者何憂不得道比丘聞佛說此語歡喜意解便得阿羅漢佛姑子名須那察多隨侍佛八年便生念我與兄弟俱行而獨端正有三十二相便惡意生隨佛後掃佛迹不令人見佛相復於人中說佛無道但言語中人意耳舍利

弗阿難聞之便愁憂不樂佛言須那察多不
爲說我惡爲稱譽佛功德耳言語中人意有
者人意多病故佛語舍利弗須那察多不校
計但瞋耳何以故不計佛有三十二相光明
神足但降伏邪道故佛數教誡須那察多正
真之言是邪待之儔是故瞋耳佛有姑姊年
老手自作縷織成袈裟持上佛佛不受如是
復言佛當哀憐我故當受之令我得福阿難
白佛言可爲我受之佛語阿難令持與諸比
丘僧我亦是比丘僧不如與衆人後世當爲
因緣今世相見歡喜者皆是前世親里善知
識何以故知之相見意解故佛言世間人相
待但苦薄不苦厚佛言本侍佛者字彌喜次
字須那察多次字阿難佛告諸比丘我年老
欲得一人侍我舍利弗摩訶迦葉目捷連等

各自願侍佛佛言不得摩訶迦葉目捷連因
禪思惟知佛欲得阿難便呼阿難言即當侍
佛阿難言我不敢往侍佛我不能侍佛目捷
連言不得不侍佛阿難言當聽我四事一者
佛餘衣我不欲受二者佛餘飯我不用三者
若有人請佛諸比丘不行我亦不行四者佛
坐禪思道時我當出入得自在佛言大善聽
汝所願於是阿難因侍佛是故阿難獨能問
佛佛弟子阿那律難提金毗羅三人共坐息
思惟七事一者少欲得道多欲不得道二者
知足得道不知足不得道三者精進得道不
精進不得道四者守六衰使不起得道不守
六衰放使起者不得道五者自護得道不自
護不得道六者守意得道不守意不得道七
者智慧得道不智慧不得道共思惟七事時

去佛六十里佛時坐禪即知三人所念便移
意往坐三人前言善哉善哉我復語汝一事
不念家欲得道念家欲不得道於是三人歡
喜即得菩薩佛語阿難人眼所見四十二萬
由旬何以知之日月去地四十二萬由旬人
眼所見日月以是知眼所見者十方廣遠之
處日月億億萬倍譬如大海中沙億億萬倍
不能計知人所作善惡殃福即前後所作殃
福億萬不可復計一切善惡要在命盡時作
惡逢惡處作善得善處殃福皆預有處皆預
有父母兄弟妻子得道便止不得道不斷絕
也佛言調達但教人作福不教人行道佛教
人作福持戒守意得道乃止調達自意生念
我當現神足於國王阿闍世所王隨我餘人
亦皆當隨我便化作一白象獨出入宮中復

化作一小兒端正無比便上王膝上王大愛
之王見調達所作如是王意呼調達勝佛王
便隨調達所語王使民及未得道沙門悉隨
王至調達所問事調達便至佛所言佛年老
可不須復教語弟子調達便呼舍利弗去及
諸沙門去調達癡貪有是惡意因亡神足佛
言癡人所作顛倒非諸佛法調達自意念言
我當飛去人見我飛悉當隨事我因欲飛去
便不能復飛調達不能自覺亡神足時即有
婆羅門行等心便從第一天上來下語舍利
弗調達以亡神足佛語舍利弗調達欲呼汝
重令得罪佛語天言調達未得神足我知當
亡之何況至今佛言人不當貪調達但坐貪
故亡失神足佛言羅漢有兩輩一名舍沫自
憂身得道即欲度世去二輩隨衛皆得度脫

佛與羅漢俱行三十七品經譬如燈火佛計校知有幾事知其本末守而滅之阿羅漢不計本末直而滅之佛譬如順樹從本至末分別知之阿羅漢行譬如從末至本從本至末者計本空從不知空者不得道佛言阿羅漢有盛陰無五陰所有皆現但不著耳有色痛癢思想識無生死佛言阿羅漢有爲默以得阿羅漢有三相一者不復犯身口意二者三毒滅三者衣食不用作好但滅飢寒意有是三因緣便能變化自在意不著衰故不得自在佛言意但當分別六衰不當著著便不得道佛言阿羅漢飛行有二因緣故令人不見一者恐人見便多供養二者恐惡人嫉妬之佛言現神足復有兩福一者人見飛行便精進念道二者從人受施令得大福用是故現

神足意喜故便得大福佛言有阿羅漢名憍梵鉢已得阿羅漢道反作牛飼弟子問佛何以故佛言是比丘前世宿命時七百世作牛今世得道餘習未盡故佛語比丘當念身無常有一比丘即報佛言我念非常人在世間極可五十歲佛言莫說是語復有一比丘言可三十歲佛復言莫說是語復有一比丘言可十歲佛言莫說是語復有一比丘言可一歲佛復言莫說是語復有一比丘言可一月佛復言莫說是語復有一比丘言可一日佛復言莫說是語復有一比丘言可一時佛復言莫說是語復有一比丘言可呼吸間佛言是也佛言出息不還則屬後世人命在呼吸之間耳佛語諸比丘當會坐一切但當說法語不能者急閉目聲守意善聽可從得道諸比

丘聞佛說此語歡喜意解即得阿羅漢道佛言比丘入人舍中當如手在空中無所罣礙意亦無所著耳聞可意是為著聞不可意是為著有一比丘白佛可以不可皆著當云何得道佛言比丘意解空都無所著是應菩薩行諸比丘聞此語皆歡喜踊躍即得無所從生法忍佛言有一比丘於山中坐歎息有一人問比丘卿為道何以歎息比丘言我在地獄中時五毒極痛今得作人復得見佛經戒而復不得道畏死復入是惡道中是故歎息耳為比丘亦憂俗人亦憂經戒亦自憂身善意不可得常或有因緣來時便念妻子錢財是為墮惡道佛言有一比丘到優婆夷家分衛因為說經優婆夷便長跪淚出比丘說經至夜半優婆夷長跪不起比丘言我行說經

未曾見人精進乃爾優婆夷報言我家有一驢鳴至夜半便死是故淚出耳佛言人說經不在為多但問解慧不也有一比丘聞佛說是事便往問佛言為我說一要法令我得道佛言非汝物莫取是汝物便取於是比丘即自思念天下萬物皆非我許獨善是家物於是比丘因白佛言我已解佛言解是便為道耳時有一比丘聞佛說此語便往問佛舍利弗為得是未佛言舍利弗悉得比丘言舍利弗何以罵我持袈裟拂我面佛言呼舍利弗來問之舍利弗言我無惡意所以罵者欲令忍辱所以持袈裟拂面者欲令眼耳鼻口淨故佛語比丘是舍利弗善權方便所作於是比丘歡喜即得阿羅漢道佛言昔一人往難比丘言人死識念思想所知皆滅行道得定

意所知亦滅有何等異比丘報言俱滅人死
命盡神不滅隨行所生但微不可便見所得
不同爲善昇天爲惡入淵以是爲異佛言有
一比丘到優婆夷家分衛見端正好比丘便
生邪念因起優婆夷即取飯具與之比丘便
捨去我不應受人施優婆夷便報之言已有
悔意可受施耳優婆夷復報比丘便受佛言
譬如人有惡即覺罪滅比丘受施無有罪佛
告諸弟子能計空制意如彈指頃即可得道
佛言有一比丘坐得定意有一優婆塞見坐
處不平牽起示其安處優婆塞後時五百劫
不得安隱何以故斷道念故佛告諸弟子有
說經慎莫中斷斷經罪重不可計佛言有比
丘行道得一禪自言我得道迹第一禪福上
生第七天上壽一劫得二禪自計得斯陀舍

第三禪福上生十五天壽八劫得四禪自計
我得阿羅漢今我何故不得生第十九天上
壽十六劫作是言已便言佛爲兩舌耳即時
從天墮地獄中不覺失天上壽便受地獄罪
譬如世間人得珍寶一日爲火起燒盡之人
生惡意爲橫燒家四善意佛言人善惡相隨無有
解已惟得道乃離俗耳佛言日中後不食有
五福一者少婬二者少卧三者得一心四者
無有下風五者身安隱亦不作病是故沙門
道士知福不食澡漱有三因緣一者爲恐小
下垢故二者肥癢隨可意三者殺蚤蚊故亦
欲使意淨無欲復不汙經此者適可除外垢
心念惡不能除爲學人第一當淨心爲本心
爲法本心正則行方行方則應道佛言昔有
沙彌與師共行見地有金便默取之語師言

疾行是間無人甚可畏師言但坐有金故令汝恐耳棄金去便不復恐弟子便爲師作禮言我愚癡無所知故金已棄便不復懼於是佛告諸弟子學人貪道如沙彌貪金何憂不得道佛言有比丘學道從師受經不精進師教取牛馬糞數斗燒之至其不盡師取大石持地獄中火燒之即作灰弟子大恐長跪問師是何等火師言汝不讀經行道死後當入地獄獄中火燒汝不復移時於是比丘惶怖便更精進日聞一阿舍便得羅漢道佛言善權方便度人如是佛言阿那舍有三結一者癡結二者世間愛結三者見未諦未盡結阿那舍譬如火上焰煙起不能有所燒須陀洹除八十八結斯陀舍除七結阿那舍除三結阿羅漢無有結須陀洹得道迹斯陀舍爲往

來得道阿那舍爲不還世間阿羅漢爲不復著何等爲道迹謂識苦世間人皆不識苦須陀洹爲識苦斯陀舍爲棄集阿那舍爲知盡阿羅漢爲行道已竟得須陀洹剎百劫乃得阿羅漢以何故乃百劫須陀洹餘有十結不斷不得阿羅漢阿羅漢但自憂身畏罪不敢預世間事餘有十疑結不解不解故便止住須陀洹所棄常有五下結一者貪欲結二者瞋恚結三者見行結四者戒貪福結五者疑意結亦謂從六天已下至世間貪欲瞋恚貪身願疑爲下結須陀洹見因緣者謂不犯五戒時當死死不犯餘人見急悉犯五因緣須陀洹斷故受新阿羅漢新故悉斷菩薩畢故罪畢畢得道乃知非常苦空非身非道人行道不當有所著行須陀洹得須陀洹行斯陀

舍得斯陀舍行阿那舍得阿那舍行阿羅漢
 得阿羅漢行辟支佛得辟支佛行菩薩得菩
 薩佛言學者隨意所作便得其報如影響相
 隨佛言鉢有四名一名爲不供食二名爲戒
 三名爲受四名爲從是得福無有瑕穢便應
 受福持鉢便立戒意中無惡念佛言阿羅漢
 不食肉者計畜生從頭至足各自有字無有
 肉名辟支佛計本精所作不淨故不食肉佛
 計一切天下皆空無所有有便滅滅復生要
 歸空故爲無所有諸弟子聞經歡喜爲佛作
 禮而去

按四

十六

音釋

療

也

治力

病也

切

也

飼

食

禪

吏

切

以

輒

而

充

切

托

呼

毛

切

也

也

切

也

切

也

切

也

也

也

也

也

也

也

也

也

也

也

也

也

也

也

也

也

也

也

也

也

也

也

也

也